

粵雅堂叢書

粵雅堂叢書

後漢書補表

後漢書補表序

宋儒嘗言讀史易令人心粗夫史非能令人粗人自粗耳則雖以之讀經亦何能免於粗也宋儒又每以博聞多識比之玩物喪志故其於史也略識興亡之大綱用人行政之得失而已自謂括其要矣其他典章制度因革損益之樊然具列者率無暇畱意卽有所撰述亦不能通貫曉析事事合符其病皆由於譾譾拘拘不能廣搜博攷以求其佐證而且專已自用不師古人其或時異勢殊有必不可以沿襲者而又不能得變通之宜此

而謂之爲粗其又奚辭向鮑子以文欲重雕宋熊方所
補後漢書年表余爲之佐校訂而其書之外漏殆不可
枚舉首載同姓王侯表冠以因子追封之齊武王縯魯
哀王仲於史例卽不合念校書與自著書不同如欲盡
加更正旣於熊氏之勤勤掇拾者大沒其扞造之勞且
改之亦必不能盡善何也其規模之已定者不能易也
勢不得不出於委曲遷就欲遂以爲完書也其可得乎
故當時但卽因其書而略正之惟綴一二校語於下不
相襍廁使人知爲熊氏之書而已私欲別爲一書自愧

力有未能也嘉定錢君晦之其學浩博無涯涘其思緒
細密精識洞達治經而經通於周秦漢魏之書無不爬
羅剔抉曩於都門欲請其所校書繕錄之會君南歸已
僦潞河之舟不果未嘗不時往來於懷而思一覩之爲
快也頃獲其所撰後漢書補表讀之非若熊氏之僅取
材於范書陳志也凡山經地志金石子集之有合於是
書者罔不網羅綴緝而其體例一依班氏之舊諸侯王
王子侯分爲二表功臣侯與外戚恩澤侯亦分二表視
熊氏之但以同異姓爲別者較然明矣其不得不與班

氏微異者班書百官公卿表前敘百官沿革若後漢則有司馬彪之續志百官已詳無庸複出故但云公卿表此又變通之得其宜者也凡熊氏所漏脫者悉攷而補之於是此書乃始完善而無少遺憾矣夫史莫重於表志而自漢東京以至於隋志尙閒見之表則全闕表也者標也標明其義類使綱舉而目張馬班之爲是也亦兼以補紀傳之所未及今則年代懸隔古籍散亡如東觀記謝承華嶠之書皆不可復見唯卽舊文之畱傳者而薈萃之然亦未嘗不增益於范書之外俾夫善讀史

者更得參互攷證以資其聞見於凡政治之污隆職官之賢否一開卷而瞭如指掌以之爲津筏也可以之爲龜鏡也可余之所謝不能者而錢君優爲之見今板行諸史旣以續漢書志繫范書之後亦當以此補表并繫之於以配馬班而始無不完不美之憾此豈讀書略觀大意者之所能乎哉錢君之於史事其精確也如是況於治經乎特是予今雖欲盡發其所藏而已自傷耄及非復前日之尙可讀矣摩挲此編有餘慕焉乾隆五十六年長至日餘姚盧文弨序

後漢書補表自序

古者五等之封或以功或以德或以先世之德見於史傳尙矣漢興高帝約非劉氏不王非有功不侯迄於中葉外戚五侯天爲晝霧自平津富民而後以丞相侯者指不勝屈封已濫矣中興大縣侯視三公小縣視上卿鄉亭視中二千石都亭者城內亭也其城外者爲離亭但謂之亭建武之初鄧賈吳寶兼食數縣降及後世紹封者食故國半租有功者食鄉亭得縣益寡和帝始封鄭衆而奄尹日恣厥後貂璫之徒口含天憲分茅裂土

駢肩接踵至有同日十九侯之盛順帝又聽養子襲爵
小人道長作福作威固寵乘權由來者漸魏武因之遂
遷九鼎故於諸侯特立宦者一門以著履霜之不可不
慎也范氏本無年表東觀記謝承華嶠諸書今竝不得
見至宋熊方始作補表以弭蔚宗之闕其時古籍散佚
尙少乃所據者祇後漢書三國志二書取材旣隘體例
亦疏因別撰斯編正史而外兼取山經地志金石子集
得諸侯王六十一人王子侯三百四十四人功臣侯三
百七十九人外戚恩澤侯八十九人宦者侯七十九人

偶有異同加辯證焉班書百官公卿表前敘百官沿革
後列公卿姓名最爲詳善司馬續志惟載百官於公卿
姓氏則仍闕如今則三公拜罷各依本紀臚列其列卿
之可攷者亦以次補入謂之公卿表不言百官者表所
不及也彙爲八卷以踵班氏後之讀史者或有取云乾
隆四十二年冬至日錢大昭晦之氏書

後漢書補表條例

前書諸侯王王子侯分爲二表井然不紊熊氏合同姓王侯爲一於體例亦多未當今仍依班氏

熊表脫漏甚多於同姓王侯則脫東海王陽濟陰王保陳畱王協恆農王辯東海王祇東安平侯茂梧安侯譽臨邑侯讓原鄉侯平皖侯閔六安侯盱愈鄉侯平湖陸侯某脩侯巡防子侯章安壽亭侯崇孝陽亭侯成蠡吾侯悝參戶亭侯博新昌侯佗合肥侯某繒侯做曲成侯建成平侯某平通侯某凡二十五人於異姓諸侯則脫

列侯寇張平阿侯王述長羅侯常歙爰戚侯趙牧建平
侯杜憲高昌侯董永率義侯張暉平阿侯耿阜滑侯公
賓就高柳侯堪列侯谷崇列侯滿頭武進侯趙慮赭亭
侯李愔海昏侯沈崇守節侯崇楊鄉侯王賞建忠侯彭
寵僮侯葛文衛公姬常北平侯王元才安喜侯王益才
蒲陰侯王顯才新市侯王仲才唐侯王季才潁陽侯申
屠志餘汗侯陳靖利取侯畢尋首鄉侯段普夕陽侯邗
崇簡陽侯某平林侯某山鄉亭侯蔣澄陽羨西亭侯蔣
通歸義侯滇岸率衆侯其至鞬陽平侯桓焉列侯陳省

列侯羅橫羌侯號封廣鄉侯摯填曲成侯王嵩邠鄉侯
黃瓊東陽亭侯宣豐壽成侯皇甫規高陽侯陳蕃列侯
張奐臨潁侯賈某富波侯周均西鄉侯鮑吉鍾離侯馮
邯無錫侯陰盛安次侯王敏都亭侯張納元鄉侯張溫
亭侯田疇宜春侯彭翼宜春侯施游列侯傅巽列侯劉
岱清苑鄉侯劉若高樂鄉侯鄧展南鄉亭侯董蒙西鄂
都鄉侯呂某好時侯楊秋都亭侯閻柔華鄉侯靈中陽
鄉侯夏侯楙都亭侯祖湟鄉亭侯題尉猛亭侯當樂鄉
亭侯生元就亭侯神都亭侯衢成遷亭侯慎常樂侯俊

高粱亭侯曷長安亭侯豐平陵亭侯夏侯漢澤侯鄧
鯉脩侯董重亭侯劉廣都鄉侯呂強凡八十四人今悉
補入凡熊表所無之侯槩注出處以便檢尋

關內侯前書不列表中東京尤不足貴

本紀安帝永初三年吏人入錢

穀得爲關內侯桓帝延熹四年賣關內侯靈帝光和元年開西邸賣關內侯中平四年賣關內侯假金印紫綬傳世入錢熊氏亦概收之失於濫矣然所收十九人之
五百萬

外尙有高峻戴涉鄧彪陰興曹成黃儁李休桓典翟歆

太平御覽二百一引東觀記

耿氏三人之類何以又遺脫耶今關內

侯槩不收入惟桓榮世襲罔替兼有戶邑不得不錄

熊氏同姓王侯表云安衆一人海昏一人見前書王子侯表異姓諸侯表云平陽高昌歸德二人凡四人見前書功臣侯表平昌周承休紅陽凡三人見前書恩澤侯表予謂前後各自爲書熊氏旣爲後漢作表凡後漢所有之侯俱宜載入且旣云已見前書而安衆一侯又見異姓表中何自相矛盾也今一一備載以資攷證

前書凡王侯輩其人後爲帝者表內不書名所以尊君也熊氏不明此例一槩書名失矣今胥遵班例

前書凡言隨父者必是別封熊氏於世傳勿替之王侯

概言隨父且言隨祖不知而作殊失班氏本旨

前書別封之侯由其父推恩者例得隨父若其子孫自立功業得侯者只宜另編乃熊氏於例應隨父之費亭侯曹操則爲另編而於例不應隨父之郗侯趙謙江南亭侯趙溫附於趙戒之下亦失史法如此之類不可枚舉

前書高祖約非有功不侯故班氏於功臣之外別立外戚恩澤一門極有深意熊氏不知其例合爲異姓一表今仍依班氏分出